

Panimulang Salita

Kilala ang Pilipinas sa pagiging multilinggwal at multikultural nito. Kung ibabase sa datos ng Ethnologue (Simons and Fennig 2018), malinaw na indikasyon ng multilinggwalismo sa bansa ang pagkakaroon nito ng mahigit 180 wika. Ngunit sa kabila ng pagiging mayaman sa wika, hindi maikakaila na marami rin sa mga wikang ito ang naisasantabi at nahaharap sa posibleng banta ng pagkalimot at pagkawala.

Maraming wika sa daigdig ang unti-unti nang naglalaho dulot ng intermarriage, urbanisasyon, at kultural at politikal na represyon at marhinalisasyon dulot ng mga polisiyang nakatuon sa pagpapalaganap ng mga mas dominanteng wika at kultura. Mas pinipili na lamang ng mga ispiker ng mga wikang ito na gamitin ang wikang itinuturing na mas prestihiyoso at may higit na sosyo-ekonomikong benepisyo.

Hindi nalalayo ang sitwasyon ng wikang Ayta Mag-antsi sa mga wikang ito. Ang kontak sa pagitan ng mga Mag-antsi at ispiker ng iba pang mga wika sa kanilang paligid tulad ng Ayta Mag-indi, Sambal, Kapampangan, Tagalog, at Ingles ay nakakaapekto sa kasalukuyang estado nito, gayundin sa persepsyon ng mga Mag-antsi sa kanilang sariling wika.

Dahil sa bantang dulot ng mga mas dominanteng wika at posibilidad na maglaho ang mga mas maliliit na wika, mahalagang mapanatili at mapasigla ang paggamit sa mga maliliit na wikang ito. Bahagi ng mga hakbang upang mapanatili at mapasigla ang paggamit sa mga wika ang dokumentasyon ng mga ito. Maisasagawa ito sa pamamagitan ng pagdodokumento sa mga umiiral na panitikan ng etnolinggwistikong grupo, gayundin sa kung paano ginagamit ang wika sa iba't ibang sitwasyon. Para sa mga linggwist, magsisilbi ang mga itong linggwistik na datos na magiging

basehan sa pagbuo ng grammar at diskyunaryo ng wika o kaya’y sa pagbuo ng mga materyales na magagamit sa pagtuturo ng wika.

Ang **Grammatical Sketch ng Wikang Ayta Mag-antsi** ay produkto ng isang linggong fieldwork na isinagawa ng mga gradwadong mag-aaral ng linggwistiks noong summer ng Akademikong Taon 2010-2011. Ang aktwal na fieldwork ay tumagal mula 19 hanggang 25 ng Abril 2011 sa Brgy. Inararo at Villa Maria sa Porac, Pampanga. Pagkatapos ng fieldwork sa Pampanga, nagpatuloy sa mga sumunod na linggo ang informant work sa pamamagitan ng personal na komunikasyon kay Norman King, isa sa mga language informant ng aming grupo. Isinagawa ang karagdagang informant work na ito upang makumpleto at maisaayos ang mga nakolektang datos. Sa pagkolekta ng mga linggwistik na datos, pangunahing ginamit ang eliciting material (word at sentence list) na binuo ni Ernesto Constantino ng U.P. Department of Linguistics.

Lubos na nagpapasalamat ang aming grupo sa pamilya nina Roman at Warlita King at sa mga opisyal ng Brgy. Inararo at Villa Maria sa pagtulong at pagpapakilala sa amin sa mga miyembro ng kanilang komunidad. Taos-puso rin ang aming pasasalamat sa aming mga language informant – Sorito Baclay, Arnel Camaya, Juliet Camaya, Teresita Cosme, Corazon Marcelo David, Freddie David Marilyn David, Pedro David, Angelina King, Oliver King, Cynthia Lansang, Jericho Lansang, at Randy Serrano – na naglaan ng kanilang panahon at tumulong upang mabuo ang linggwistik na datos na kinailangan para sa grammatical sketch na ito.

Umaasa kami na makakatulong ang grammatical sketch na ito upang mapanatili at mapasigla pa ang paggamit ng wikang Ayta Mag-antsi lalo na ng mga mas batang henerasyon ng ispiker nito. Nawa’y maging daan din ito sa mga susunod pang mga pag-aaral na isasagawa sa wika at maging sa iba pang wikang Ayta.

Viveca V. Hernández, Ph.D.

Prop, Linggwistiks 225
Summer, AY 2010-11